

FUTBOLA



Mendiguren titular izango dela baieztatu zuen atzo Heynckes alemaniarrek.

CARLOS VILLAGRAN

Bolada txarra etetera

Jupp Heynckes alemaniarrek taldearen suspertzea espero du Valladoliden kontra

Logroñesen kontra galdutako partidurekin hasitako bolada txarrari amaiera eman nahi dio gaur Athleticen Valladoliden kontra, San Mamesen jokatu duen partiduan. Jupp Heynckes jokalariekin mintzatu da eta taldearen suspertzea espero duela esan du. Ritxi Mendiguren hasieratik zelairatuko duela ziurtatu du entrenatzaile alemaniarrek.

RAMON BASALDUA / BILBO

Athleticeko zaletu, entrenatzaile eta jokalariek ez dute Zaragoza taldea erraz ahaztuko. Alde batetik, Victor Fernandezek zuzentzen duen taldearen kontra lortu zuten zuri-gorriek denboraldiko azken garaipena. Bestetik, talde horren kontra jokatu du Athleticen aurtengo partidurik txarrena, jarraian galdu duen Jaugarrena.

Zaragozaren kontrako partiduan, bat eta hutseko emaitzari buelta eman eta garaipena lortu ondoren sailkapeneko lidergoan zegoen Athletic eta aurtengo Liga txapelketan gauza handiak egiteko gai izango zela zirudien. Hortik aurrera goitik behera aldatu dira gauzak. Heynckesen mutilek porrot egin dute Logroñes, Osasuna, Valencia eta Zaragozaren kontra, golak egiteko zailtasun handiak dituztela erakutsiz gainera.

GOLAK EGITEKO ZAILTASUNAK

Felipe Mesonesek zuzentzen duen Valladolid taldea izango du aurkari gaur arratsaldean Athleticen San

Mamesen. Orain dela hiru aste inork ez zuen zalantzan jarriko Athleticen zailtasun handirik gabe menperatuko zuela bigarren mailatik igo berria den taldea. Egun ordea, azken jardunaldietan ikusitakoaren arabera, urduritasuna da nagusi Athleticen zaletuen artean.

Jupp Heynckes, Athleticen entrenatzailea lasai dago ordea. Alemaniarrek astelehenean esan zuenez, konfiantza handia du bere taldean, Bayern eta Borussia taldeetan ere une larriak bizi izan zituela gaineratuz. Hasierako hamaikakoari dagokionez, Heynckesek ez du esan nortzuk zelairatuko dituen hasieratik. Edozein kasutan, Ritxi Mendiguren titular izango dela esan du alemaniarrek. Ikusi egin beharko da ostera nola osatzen duen Heynckesek hamaikakoa. Mendigurenek erdialdeko ezker hegaketik jokatzen badu, Ander Garitano erdira pasa daiteke. Era berean Carlos Garciak eskuinetik jokatu luke, Xabier Eskurza ordezkoren aulkian eseriko litzatekeen bitartean. Guzti hau aukera bat besterik ez da.

Beste alde batetik, Ernesto Valverde gera daiteke ordezkoren aulkian eta Julen Guerrerok joka dezake aurrealdean Zigandarekin batera. Edozein kasutan argi eta garbi dago Athleticen gol aukerak gauzatu egin beharko dituela larri ibili nahi ez badu.

Heynckesek 20 jokalarri deitu ditu, gizon batzuk arazoekin dabilzako (Carlos Garcia, Andrinua, Garitano eta Larraiz). Hamaikakoa hau izan liteke: Valencia; Lakabeg, Andrinua, Larraiz II, Larrazabal; Carlos Garcia edo Urrutia, Garitano, Guerrero, Mendiguren; Valverde eta Ziganda.

ATHLETIC		VALLADOLID
ALINEAZIOAK		
VALENCIA	1	LOZANO
LAKABEG	2	FERRERAS
LARRAZABAL	3	MARTIN
LARRAINZAR II	4	IVAN
ANDRINUA	5	NAJDOSKI
GARITANO	6	CUARESMA
C.GARCIA/URRUTIA	7	GRACIA
GUERRERO	8	CORREA
ZIGANDA	9	ALBERTO
MENDIGUREN	10	CASTILLO
VALVERDE	11	MIGUELO
HEYNCKES	Ent.	MESONES
Arbitroa: Andujar Oliver Zelaia: San Mames Ordua: 17.00		

Lehen mailari eutsi

R.BASALDUA / BILBO

Valladolid taldea Lehen Mailan dagoen talde ahulenetarikoa da inolako zalantzarik gabe. Entrenatzaile eta jokalariek beti esaten dute futbolearen ez dagoela aurkari txikirik. Athleticen kasuan, zuri-gorriek Valladolidi San Mamesen irabazten ez badiote taldearen egoera larria dela argi eta garbi geratuko da. Beste era batera esateko, azken jardunaldietan emaitza txarrak lortu arren Athleticen irabazi egin beharko luke gaur Valladoliden kontra Katedralean jokatu duen partidua.

Lehen Mailari eustea da Felipe Mesonesek zuzentzen duen taldearen helburu nagusia. Orain arteko partiduetan ikusitakoaren

arabera Valladolid ez doa bide okerretik, zortzi jardunaldi jokatu ostean sei puntu eta bi negatibo besterik ez dute eta. Pucelako taldearen hasierako hamaikakoan ez dago izen handiko gizonik, jokalarri batzuk esperientzia handikoak diren arren. Javi Gracia, iaz arte Athleticen jokalarri izandako mutila ari da Felipe Mesonesen aginduetara. Horrez gain, Amaviscak eta Albertok aurrealde arriskutsua osatzen dute Real Madriden kontra erakutsi zuten moduan. Osasunak arazo handiak izan zituen Mesonesek jarritako 'autobusa' gainditzeko eta Athletic ere larri ibili daiteke. Nolanahi ere, zuri-gorriek gaurko partidua irabazi egin beharko lukete arazorik izan nahi ez badute.

Ritxi Mendiguren: «Urduritasuna izan daiteke gure aurkari nagusia»

RAMON BASALDUA / BILBO

Ritxi Mendigurenek ez du zorte handirik izan denboraldi hasiera honetan. Ebakuntzatik osatu ostean hasieran uste baino denbora gehiago behar izan du ofatarrak, Liga txapelketako partidu batean jokatzeko prest egon ahal izateko. Ligako zortzi partidu jokatu direnean, hasieratik jokatzeko aukera emango dio Heynckesek gaur iazko denboraldian titularra izan zen Ritxi Mendiguren. Ofatarraren iritziz, Athleticen egoera ez da ona momentu honetan, emaitzak di-rela eta. Jokoa ordea, ez da txarra izan partidu gehienetan. «Tal-dearen egoera ez da oso ona, azken partiduetan lorturiko emaitzak txarrak izan direlako. Zaragozaren kontra izan ezik, aurreko hiru partiduetan garaipena lortzeko aukera izan genuen, baina azkenean ez ginen punturik lortzeko gai izan. Entrenatzaileak hasieratik jokatzeko aukera eman dit eta noski, ondo jokatzen ahaleginduko naiz», adierazi zuen Ritxi Mendiguren.

BOLADA TXARRAREKIN AMAITU

Sailkapeneko lidergoan izan den talde batek hurrengo lau partidua jarraian galtzen dituenen, urduritasuna nagusitzen da. Mendiguren esanetan urduritasun hori izan daiteke Athleticen aurkari nagusia gaurko partiduan. «Bolada txar hau lehenbailehen amaitzea nahi dugu denok. Zertan esanik ez dago gaurko partidua garrantzi handia duela, aurreko jardunaldietan izan ditugun emaitza txarrak direla eta. Partidu zaila da, eta lasai ekin beharko diogu. Gu geu urduri jartzen bagara, gauzak okertu egin daitezke. Horrekin batera, zaletuek ulertu egin behar dute gaurko partidua oso zaila dela guretzat, eta pazientzia eskatuko nieke». Teorian neurketa erraza dute gaur bilbotarrek. Mendigurenentzat ordea, kontu handia izan beharko da puntuak etxean gera daitezen. «Hasiera batean Valladolid aurkari erraza da, baina askotan horrelakoak izaten dira partidu zailenak», esan zuen ofatarrak.

Gol aukerak gauzatzeko arazoak dituela erakutsi du Athletic azken partiduetan. Valladolidek gizon asko pilotzen du atzealdean eta zuri-gorriek ez dute lan erraza izango. «Gola sartzeko zailtasunak urduri jar gaitzake. Nire ustez lasai jokatu behar dugu partidua 90 minutu dituela gogoratuz. Lan handia egin beharko dugu baina zertan esanik ez dago Athletic Valladolidi irabazteko gai dela, noski baietz», amaitu zuen Athleticen jokalarriak.